

Minister Michelle Hooyboer na celebracion di CEDEHM

Hende muhenan awor tin mas oportunidad pa desaroya



ORANJESTAD (AAN): Den cuadro di su maneho como Minister di Asuntonan Economico, Asuntonan Social y Cultura, Michelle Hooyboer-Winklaar a celebra un ocasion special na CEDEHM. Na aña 2009, ora cu e gobierno actual a tuma mando di pais Aruba, Minister Hooyboer-Winklaar a traha y prepara su presentacion na Nacionnan Uni na Geneve, tocante e situacion di hende muhe; kico ta e cosnan cu nos, como pais, kier tin pa nos hende muhenan y kico ta e desaroyo di nos hende muhenan.

“Mi tabatin e honor pa presenta esaki pa mi pais Aruba. Nos no tabatin un luga, unda nos hende muhenan por bin hunto na un manera hopi dinamico, pa combersa y comparti tur e diferente aspectonan di bida di un hende muhe. Esey tabata netamente e concepto tras di Centro di Desaroyo di Hende Muhe y una bez cu nos a trece e concepto den e bunita edificio aki, nos a embecece e edificio mas ainda, door di trece mas instancia den e edificio. Awe nos tin e grato placer di yama bon bini na dos instancia mas, esta Pro Lechi Mama y Fundacion Bon Nochi Drumi Dushi”, e Minister a duna di conoce durante e celebracion.

Mirando back atras, kico tur a transcuri den e ultimo 4 añanan, por a presencia un

bunita exposicion di un grupo di hende muhe cu a pasa den e programa di “Kibra Silencio” cu ta enfoca riba violencia domestico. Nan a haya sosten di CEDEHM, cu ta traha na bienestar di nos hende muhenan, pero tambe ta enfoca riba nos hende hombernan. Ya cu e maneho di e Ministerio tin como meta pa no solamente sostene nos hende muhenan, pero tambe con nos por traha pa uni e hende muhenan y e hende hombernan pa sigui desaroya nos Aruba na un manera mas positivo pa tur. Na e exposicion tin obra di un artista masculino tambe incorpora como ehempel pa ilustra loke CEDEHM kier logra.

Parti di e maneho di Minister di Asuntonan Economico, Asuntonan Social y Cultura ta cu, CEDEHM ta para pa yuda y sostene e personanan mas vulnerabel den nos comunidad. Durante e celebracion, tabatin algun dama para dilanti, cu a pasa den e curso di; kibrandu cadena di violencia domestico, cu ta un programa cu duracion di luna di april te juni di e aña aki y e damanan aki a demostra cu nan a pasa di ‘victim – victory’ y cu nan tin talento y awo nan ta auto suficiente y completamente independiente pa realisa nan soño.